

आकाशवाणी

खबरां शिवि सूरी कोला

1. केंद्री मंत्रिमंडल नै क्षेत्रीय संपर्क योजना संशोधित यू.डी.ए.एन गी 10 बरें दी अवधि लेई 2036 तोड़ी शुरू करने ते लागू करने दी मंजूरी देई दिती।
2. केंद्र सरकार नै आखेआ जे एलपीजी रिफिल बुकिंग दी मजूदा समें-सीमा च कोई बदलाव नेई कीता।
3. तेहरान आसेआ केई खाड़ी देशें पर हमले जारी रखने दे मददेनजर, अमरीका नै ईरान कन्नै युद्ध खत्म करने लेई 15 सूत्री योजना दा प्रस्ताव रखेआ ऐ।
4. रेल मंत्री अश्विनी वैशणव होरें लोकसभा गी दस्सेआ जे कोविड-19 दे बाद इक्क जहार शा मतियां ट्रेनां शुरू कीतिआं गेइयां न।
5. रक्षा मंत्री राजनाथ सिंह होरें अज्ज सीमा शिड़क संगठन विशे पर संसदी परामर्श समिति दी बैठक दी अध्यक्षता कीती।
6. बांग्लादेश निहत्थे लोकें पर पाकिस्तान दी क्रूर सैन्य कार्रवाई दे पीड़ितें दे चेतें च नरसंहार दिवस मना'रदा ऐ।

<><><><><><>

Cabinet

केंद्रीय मंत्रिमंडल ने अज्ज इलाकाई संपर्क योजना - संशोधित उड़ान योजना गी बरें 2026-27 थमां बरें 2035-36 तगर 10एं बरें दी अवधि लेई 28 जहार 840 करोड़ रुपें

दे कुल खर्चे कन्नै शुरू ते लागू करने दी मंजूरी देई दिती ऐ। नमीं दिल्ली च मंत्रिमंडल दी बैठक दे बाद मीडिया गी जानकारी दिंदे होई सूचना ते प्रसारण मंत्री अश्विनी वैष्णव होरें दस्सेआ जे इलाकाई संपर्क गी बढ़ावा देने लेई ऐसी थाहें पर 100 ब्हाई अड्डें दा विकास कीता जाहग, जित्थे अजे तगर ब्हाई पट्टियां नेई हैन। एहदे'नै घट्ट सेवा आहले ते मते पच्छेत्ते इलाकें च इलाकाई ब्हाई संपर्क च सुधार होग। एहदे कन्नै दुए ते त्रीये दर्जे दे शैहें च आर्थिक विकास, बपार ते सैलसफा गी बी बढ़ावा मिलग ते आम नागरिकें लेई किफायती ब्हाई जातरा गी सौक्खा बनाया जाई सकग। एहदे'नै दूर-दरेडे ते प्हाड़ी इलाकें च एमरजेन्सी ते सेहत सेवाएं तगर पुज्ज च बी सुधार होग ते इलाकाई ब्हाई अड्डें ते एयरलाइन ऑपरेटरें लेई मती स्थिरता जकीनी बनग।

<><><><><><>

Govt. LPG Rumours

सरकार नै उनें खबरें ते सोशल मीडिया पोस्टें दा खंडन कीता ऐ जिंदे च दावा कीता गेआ हा जे प्रधानमंत्री उज्जवला योजना तैहत एलपीजी कनेक्शन लेई रिफिल बुकिंग दी समें सीमा गी संशोधित करिये 45 दिन करी दिता गेआ ऐ। पेट्रोलियम ते प्राकृतिक गैस मंत्रालय नै साफ कीता ऐ जे ऐसा कोई बदलाव नेई कीता गेआ ऐ ते मौजूदा रिफिल बुकिंग दी समें-सीमा च कोई बदलाव नेई ऐ। शैहरी क्षेत्रें च एह 25 दिन ते ग्रामीण क्षेत्रें च 45 दिन बाद सिलेंडर लोक लेई सकदे न। सरकार नै एह बी दोहराया जे देश च पर्याप्त एलपीजी स्टॉक उपलब्ध ऐ ते चिंता दा कोई कारण नेई ऐ।

<><><><><><>

## LS-Finance Bill

लोकसभा नै ध्वनि मत राएं वित्त विधेयक 2026 पारित करी दितता ऐ। एह विधेयक वित्त बरे 2026-27 लेई केंद्र सरकार दे वित्तीय प्रस्तावें गी लागू करने दा प्रावधान करदा ऐ। सदन नै सरकार आसेआ प्रस्तावित संशाधनें गी मंजूरी देई दिती ऐ। अज्ज सदन च वित्त विधेयक 2026 पर होई दी चर्चा दा जवाब दिंदे होई केंद्री वित्त मंत्री निर्मला सीतारमण होरें आखेआ जे सरकार सूक्ष्म, लघु ते मध्यम उद्यमें, करसानें ते सहकारी सकमितियें गी सशक्त बना'रती ऐ। उनें आखेआ जे रोजगार सृजन, उत्पादन ते देश दे समग्र विकास दे केंद्र च ऐ।

<><><><><><>

## RS-Bill

गृह राज्यमंत्री नित्यानंद राय होरें अज्ज लोकसभा च विदेशी अंशदान (विनियमन) संशोधन विधेयक-2026 पेश कीता। इस विधेयक दा मकसद विदेशी अंशदान (विनियमन) अधिनियम, 2010 च संशोधन करना ऐ। इस दरान श्री राय होरें आखेआ जे एह विधेयक विदेशी अंशदान दे उपयोग गी मता पारदर्शी ते जवाबदेह बनाग।

<><><><><><>

## T.N Election

तमिलनाडू च चुनां कोला पैहले गठबंधन सहयोगियें बश्कार सीट बंटवारे दी बवस्था पूरी होने दी मेद ऐ। A.I.A.D.M.K. दे मेदवारें दी अपनी पैहली सूची जारी करी दिती गई ऐ। राज्य बीजेपी अध्यक्ष नैनार नागेंद्रन होर मेदवारें दी सूची गी अखीरी रूप देने लेई दिल्ली च न जिसले जे डीएमके दे नेतृत्व आहले धर्मनिरपेक्ष लोकतांत्रिक गठबंधन

आसेआ बी अज्ज सीट बंटवारा पूरा कीते जाने दी मेद ऐ। पुदुचेरी च नामांकन वत्रे दी जांच पूरी होने दे बाद राजनीतिक दल चुनां प्रचार च जुटी गे न।

<><><><><><>

### US-Iran Proposal

अमरीका नै ईरान गी संघर्ष खत्म करने ते औदे परमाणु कार्जक्रम गी खत्म करने दे मकसद कन्ने 15 सूत्री प्रस्ताव भेजेआ ऐ। राष्ट्रपति डॉनल्ड ट्रम्प होरे दावा कीता ऐ जे ईरान समझौता करना चाहंदा ऐ। मीडिया खबरें मताबक एह प्रस्ताव मध्यस्थे राएं भेजेआ गेआ हा। एहदे च दुश्मनी गी रोकने, ईरान दी परमाणु महत्वकाक्षाएं पर रोक लाने ते औदी क्षेत्रीय भूमिका गी नमा रूप देने लेई व्यापक ढांचा पेश कीता गेआ ऐ। इस योजना च ईरान थमां अपने त्रै मुख परमाणु संयंत्रे गी बंद करने, यूरेनियम संवर्धन रोकने ते अपने बैलेस्टिक मिसाइल कार्जक्रम गी निलंबित करने दा आह्वान कीता गेआ ऐ। एहदे च प्राक्सी समूहे लेई ईरान दे समर्थन गी सीमित करने ते स्ट्रेट ऑफ होमुर्ज गी पूरी चाल्ती खोलने लेई बी आखेआ गेआ ऐ। योजना च इक महीने दा युद्ध विराम शामिल ऐ। बदले च ईरान पासेआ परमाणु सरबन्धी सब्बे प्रतिबंध हटाई दिते जांगन। अमरीका बिजली उत्पादन लेइ बुशहर च निगरानी आहले नागरिक परमाणु कार्जक्रम दा समर्थन करोग। क्षेत्र च जारी संघर्ष चौथे हफते च प्रवेश करी चुके दा ऐ। व्हाईट हाउस च पत्रकारे कन्ने गल्ल करदे होई राष्ट्रपति ट्रम्प होरे आखेआ जे अमरीका इस युद्ध गी खत्म करने लेई गल्लबात करा' रदा ऐ जेदे च ज्हों लोक मारे जाई चुके दे न ते इतिहास दा सबने शा भीषण उर्जा संकट पैदा होई गेदा ऐ जेदे करी वैश्विक स्तर पर ईंधन दी कमी ते बजारें च उथल-पुथल मची गेदी ऐ।

<><><><><><>

## US Diesel Price

अमरीका दे कैलिफोर्निया राज्य च डीजल दिआं कीमतां रिकॉर्ड ऊंचाई स्तर पर पुज्जी गेइयां न। अमरीकन ऑटोमोबाइल एसोसिएशन दे ताजा आंकड़ें मूजब, कैलिफोर्निया च डीजल दी औसत कीमत 7 डॉलर शा मती प्रति गैलन तगर पुज्जी गेई ऐ। पर, अमरीका च डीजल दी मजूदा राश्ट्री औसत कीमत तकरीबन 5 डॉलरें शा मती प्रति गैलन ऐ। अमरीकी मीडिया रिपोर्टें दे मताबक, डीजल दी बधदी कीमतें दी वजह तेल शोधन समर्थ च कमी ते ईरान युद्ध करी वैश्विक ऊर्जा आपूर्ति च रूकावट ऐ। कैलिफोर्निया ने अक्टूबर 2025 थमां 2 तेल शोधक कारखाने मुहाई दिते न, जेह्देंनै ओहदी शोधन समर्थ दा तकरीबन 20 फीसद हिस्सा घट्ट होई गेआ ऐ। रिपोर्टें च आखेआ गेआ ऐ जे डीजल दी कीमतें च बाद्दे कन्नै ट्रांसपोर्ट सरबंधी लागत बधा करदी ऐ।

<><><><><><>

## Vaishnav Training

रेल मंत्री अश्विनी वैश्वव होरें आखेआ जे कोविड महामारी दे बाद देश भर च कोई 124 नमीं ट्रेनां शुरू होई गेइयां न। मंत्री होर अज्ज लोकसभा च प्रश्नकाल दरान पूरक सुआलें दा जवाब देआ रदे हे। श्री वैश्वव होरें आखेआ जे एह्दे कन्नै गै मजूदा ट्रेनें च 4 जहार 651 नमें कोच बी जोड़े जाडन।

<><><><><><>

## Chhatisgarh-Maoists Surrender

छत्तीसगढ़ च अज्ज माओवादी संगठन दे इक शीर्ष नेता पापा राव समेत कुल 18 माओवादियें आत्मसमर्पण करी दिता ऐ। आत्मसमर्पण करने आहलें च 7 महिला शामिल न। पापा राव माओवादी संगठन दी राज्य क्षेत्रीय समिति दा सदस्य हा ते उस पर 25 लख रपे दा ईनाम हा। बस्तर क्षेत्र दे संभागीय मुख्यालय जगदलपुर च आयोजित इक कार्यक्रम च माओवादिएं नै पुलस ते केंद्री सशस्त्र पुलस बलें दे वरिष्ठ अधिकारियें दे सामने आत्मसमर्पण कीता। माओवादिएं 8 ए.के 47 रफलां, इक सेल्फ लोडिंग ग्रेनेड लांचर सने कई हथियार बी सौंपे।

<><><><><><>

## Rajnath -BRO

रक्षा मंत्री राजनाथ सिंह होरें अज्ज सीमा शिड़क संगठन गी लेइयै संसदीय परामर्श समिति दी बैठक दी अध्यक्षता कीती। सोशल मीडिया पोस्ट च श्री सिंह होरें आखेआ जे बैठक दरान रक्षा, बुनियादी ढांचा विकास ते चला'रदी सामरिक पैहलें कन्नै सरबंधत महत्वपूर्ण मुद्दें पर व्यापक ते गहन विचार-विमर्श कीता। उनें आखेआ जे इनें पैहलें दा उद्देश्य राष्ट्री सुरक्षा ते परिचालनगत तैयारियें गी सशक्त बनाना ऐ।

<><><><><><>

## Bangladesh-Genocide Day

बांगलादेश 'कोड नेम आपरेशन सर्च लाइट' तैहत 25 मार्च 1971 दी रातीं पाकिस्तानी बलें आसेआ कीते गेदे क्रूर सैन्य हमले दे चेतें च पीड़ितें दी याद च अज्ज नरसंहार दिवस मना' रदा ऐ। एह दिन देश दे इतिहास दे काले अध्यायें चा इक मन्नेआ जंदा

ऐ। इस दिन मुक्ति संग्रमा दरान तत्कालीन पूर्वी पाकिस्तान विशेष रूप कन्नै ढाका च विद्यार्थियें, शिक्षकें ते नागरिकें सने निहत्थे बंगालियें दा क्रूरता कन्नै नरसंहार कीता गेआ हा। राष्ट्रपति मोहम्मद शहाबुद्दीन ते प्रधानमंत्री तारिक रहमान होरें पीड़ितें गी श्रद्धांजलि अर्पित कीती। एहदे जरिए उनें स्वतंत्रता संघर्ष दी भावना गी संरक्षित करने दी राष्ट्र दी बचनबद्धता गी दोहराया।

<><><><><><>

### LG-ISTD

लेफ्टिनेंट गवर्नर मनोज सिन्हा होरें खिते च सिक्खने ते विकास सरबन्धी तंत्र गी तगड़ा बनाने दी दिशा च इक महत्वपूर्ण गेंह दे तैहत सिखलाई ते विकास सरबन्धी इंडियन सोसायटी फॉर ट्रेनिंग एण्ड डिवेलपमेंट दे जम्मू चैप्टर दा अज्ज उद्घाटन कीता। इस पैहलकदमी दा मकसद जम्मू गी पेशेवराना सिखलाई दे इक गढ़ दे तौर पर स्थापित करना ऐ। इस मौके पर किट्ठ अग्गे भाशण दिंदे होई एल.जी होरें सरबन्धत लोकें ते संस्थानें गी सशक्त बनाने दी जरूरतें पर जोर दिता तां जे नर्मी उभरा' रदी चुनौतिएं दा सामना कीता जाई सकै। सिन्हा होरें युनिवर्सिटिएं ते संगठनें गी गुजारश कीती जे ओह आई.एस.टी.डी सोसायटी कन्नै जुड़न ते भारत गी इक अगुआ राष्ट्र बनाने दे सुखने गी सच करने आली भेठा अपना जोगदान देन।

<><><><><><>